

**KUVENDI**  
**PROJEKTLIGJ**

Nr. \_\_\_\_\_, datë \_\_\_\_\_ 2019

**PËR**

**DISA SHTESA DHE NDRYSHIME NË LIGJIN NR 9636, DATË 6.11.2006**

**“PËR MBROJTJEN E SHËNDETIT NGA PRODUKTET E DUHANIT”, TË  
NDRYSHUAR**

Në mbështetje të neneve 78 dhe 83, pika 1 e Kushtetutës së Republikës së Shqipërisë, me propozimin e Këshillit të Ministrave,

**K U V E N D I**

**I REPUBLIKËS SË SHQIPËRISË**

**VENDOSI:**

Në Ligjin Nr. 9636, datë 6.11.2006, “Për mbrojtjen e shëndetit nga produktet e duhanit”, të ndryshuar, bëhen këto shtesa dhe ndryshime:

**Neni 1**

Në nenin 3 bëhen këto ndryshime:

1. Pika 1 riformulohet si vijon:

*“1. Produkte duhani, nënkupton produkte që mund të konsumohen dhe përmbajnë, qoftë dhe pjesërisht duhan, të modifikuar gjenetikisht ose jo.”*

---

*Ky projektligj përafrohet pjesërisht me Direktivën 2014/40/BE e Parlamentit Europian dhe e Këshillit të datës 3 Prill 2014 “Mbi përaftrimin e ligjit, rregullave dhe dispozitat administrative të shteteve anëtare rreth prodhimit, prezantimit dhe shitjes së duhanit dhe produkteve të duhanit dhe shfuqizimi i Direktivës 2001/37/KE.*

*Gazeta Zyrtare e Komunitetit Europian, L 127/1, 29.4.2014, CELEX nr. 32014L0040.*

2. Pika 7 riformulohet si vijon:

*“7. Pirje duhani është ndezja, thithja dhe mbajtja në dorë e ndezur e çdo produkti duhani si dhe cigares elektronike e shisha/nargjile.”*

3. Pas pikës 18 shtohen pika 19, 20, 21, 22, 23, 24, 25, 26, 27, 28, 29, 30, 31, 32, 33 si vijon:

*“19. Cigare nënkupton një mbështjellje duhani të grirë e cila konsumohet nëpërmjet procesit të djegies, përveç purove, cigarillove dhe mbështjelljeve të tjera të duhanit.”*

*“20. Duhan kaush/për t’u dredhur nënkupton duhanin e grirë në fije të imta që përdoret për pirje pa përpunim të mëtejshëm industrial.”*

*“21. Duhan për llullë nënkupton duhanin e grirë trashë, për pirje me llullë.”*

*“22. Puro nënkupton duhanin e grirë, i mbështjellë me gjethe duhani ose me mbështjellëse letre me ngjyrë duhani, me ose pa filtër, që konsumohet nëpërmjet procesit të djegies.”*

*“23. Duhan për nargjile (shisha), nënkupton duhanin i cili konsumohet në formë tymi ose avulli, duke kaluar detyrimisht në një enë uji, i cili mund të jetë ose jo i aromatizuar, ose i përzier me sheqer frutash ose melasë.”*

*“24. Duhan për tu nuhatur (burnot), nënkupton një produkt duhani pa tymosje, që konsumohet nëpërmjet nuhatjes”.*

*“25. Duhan për përdorim oral, nënkupton të gjitha produktet e duhanit për përdorim oral me përjashtim të atyre produkteve që janë për t’u thithur me hundë apo për përtpje, të prodhuara tërësisht ose pjesërisht prej duhanit, në forme pluhuri, grimcash apo të kombinuara së bashku, që paketohen në qeska poroze.”*

*“26. Duhan pa tym, nënkupton një produkt duhani që nuk digjet, duke përfshirë duhanin për përtpje, duhanin për thithje me hundë, duhanin për përdorim oral dhe duhanin me ngrohje.”*

*“27. Tym, nënkupton grimcat e ngurta ose të lëngëta në ajër dhe gazet e krijuara kur një material digjet së bashku me sasinë e ajrit që përthithet apo përzihet me masën, përfshirë edhe tymin e nxjerrë prej mushkërive gjatë duhanpirjes.”*

*“28. Djegie, nënkupton një proces kimik oksidimi që ndodh me një shpejtësi aq të madhe sa të prodhojë nxehtësi dhe zakonisht dritë në formë inkandeshente ose flake.”*

*“29. Produktet e reja të duhanit, nënkuptojnë produktet e duhanit që (a) nuk bëjnë pjesë në asnjë nga kategoritë e mëposhtme si: cigare, duhan kaush/për t’u dredhur, duhan për nargjile, puro, cigarillo, duhan për përtpje, duhan për thithje me hundë, duhan për përdorim nga goja dhe (b) vendosen në treg pas hyrjes në fuqi të këtij ligji.”*

*“30. Cigare elektronike, nënkupton një produkt që mund të përdoret për konsum të avullit që përmban nikotinë me anë të një pjese që vendoset pranë gojës, ose çdo përbërës tjetër i atij produkti, duke përfshirë një mbajtëse, një depozitë dhe një pajisje pa mbajtëse ose depozitë. Cigaret elektronike mund të jenë një përdorimshe ose me rimbushje me anë të një ene për*

*rimbushje ose një depozite, ose mund të rikarikohet me një mbajtëse njëpërdorimshe."*

*"31. Enë rimbushëse, nënkupton një pajisje që mban një lëng me përmbajtje nikotine, e cila mund të përdoret për rimbushje të një cigareje elektronike."*

*"32. Duhan me ngrohje, nënkupton një produkt duhani posaçërisht i krijuar për t'u ngrohur që përdoret për të çliruar aerosol që përmban nikotinë dhe substanca të tjera, i cili thithet nga përdoruesit nëpërmjet gojës."*

*"33. Shije karakteristike, nënkupton një shije apo aromë qartësisht të dallueshme, e ndryshme nga ajo e duhanit, si rezultat i përdorimit të një lënde shtesë apo i një kombinimi lëndësh shtesë duke përfshirë, por pa u kufizuar në: fruta, erëza, barishte, alkol, karamеле, mentol ose vanilje; të cilat janë të kuptueshme para ose gjatë konsumit të produkteve të duhanit."*

*"34. Cigarillo, nënkupton një lloj puro me peshë jo më të madhe se 3 gram."*

## **Neni 2**

Në Nenin 5, pas pikës 3 shtohen pikat 4, 5 dhe 6 me këtë përmbajtje:

*"4. Çdo njësi paketimi e cigareve elektronike dhe paketim i rimbushjeve të lëngut të nikotinës duhet të përmbajë një fletë informuese në gjuhën shqipe ku të përfshihet informacion rreth: instruksioneve të përdorimit dhe magazinimit të produktit duke përfshirë dhe një referencë që ky produkt nuk rekomandohet të përdoret nga të rinjtë dhe nga joduhanpirësit; kundërintikacionet e përdorimit; paralajmërimet për grupet e veçanta të riskut, paralajmërimet për efektet anësore; shkallën e varësisë dhe toksicitetit; dhe detajet e kontaktit të prodhuesit ose importuesit."*

*"5. Lëngu me përmbajtje nikotine vendoset në treg vetëm kur është në mbajtëse të dedikuara për rimbushje, me volum jo më shumë se 10 ml ose në formën e cigareve elektronike një përdorimshe me volum jo më shumë se 2 ml."*

*"6. Nuk lejohet vendosja në treg e lëngut që përmban më shumë se 20mg/ml nikotinë."*

## **Neni 3**

Në nenin 8 shtohet një paragraf me këtë përmbajtje:

*"Prodhuesit dhe/ose importuesit e produkteve të reja të duhanit, përfshirë cigaret elektronike dhe duhanin me ngrohje, janë të detyruar të njoftojnë Ministrinë përgjegjëse për Shëndetësinë, për produktet e reja të duhanit. Ky lajmërim duhet dorëzuar, jo më vonë se 30 ditë para hedhjes në treg të produktit. Njoftimi duhet të përmbajë:*

- a. informacion kontakti të prodhuesit ose importuesit në Shqipëri;*
- b. një përshkrim i detajuar i produktit,*
- c. instruksionet e lidhura me përdorimin e tij,*
- d. listën e përbërësve të produktit,*
- e. materialet e disponueshme të kërkimeve shkencore, rrezikun e varësisë dhe tërheqjen e produktit."*

#### **Neni 4**

Në nenin 9, pas togfjalëshit produkte të duhanit shtohen fjalët “cigare elektronike, shisha/nargjile”.

#### **Neni 5**

Ne nenin 10, pas togfjalëshit produkte të duhanit shtohen fjalët “cigare elektronike, shisha/nargjile”.

#### **Neni 6**

Në nenin 11, pas fjalisë së parë shtohen paragrafët e mëposhtëm:

*Ndalohet vendosja në treg e produkteve të duhanit me shije karakteristike.*

*Një njësi pakete cigare duhet të përmbajë të paktën 20 cigare. Një njësi pakete duhan për dredhje duhet të përmbajë jo më pak se 30 gram neto produkt duhani.”*

#### **Neni 7**

Në nenin 13 fjalia e fundit e paragrafit të parë riformulohet si vijon:

*“Ndalohet çdo lloj forme tjetër reklamimi i produkteve të duhanit, përfshirë promocionin indirekt përmes ngjyrave që përfaqësojnë logot e kompanive, ose promocionin nëpërmjet ekspozimit të produkteve që imitojnë paketimin e jashtëm të një produkti duhani.”*

#### **Neni 8**

Në nenin 20, pas pikës 1 shtohet pika 1/1 me këtë përmbajtje:

*Për shkelje të nenit 15 dy herë brenda një perjudhe 3 mujore subjekti i tatueshëm dënohet me gjobë sa dyfishi i gjobës së vendosura në gjermën ë/i të këtij neni.*

*Nëse subjekti i tatueshëm i penalizuar për herë të dytë gjendet përsëri në shkelje nenit 15 brenda një afati kohor 1 vjeçar atëherë ndaj tij vendoset gjobë në vlerën gjashtëfishi i gjobës së vendosur në gjermën ë/i të këtij neni dhe pezullim të aktivitetit deri në shlyerjen e masave të gjobës.”*

#### **Neni 9**

#### **Hyrja në fuqi**

Ky projektligj hyn në fuqi 15 ditë pas botimit në “Fletoren Zyrtare”, me përjashtim të nenit 6 të këtij projektligji, paragrafi i parë i të cilit hyn në fuqi 48 muaj pas botimit në fletoren zyrtare dhe paragrafi i dytë i të cilit hyn në fuqi 24 muaj pas botimit në fletoren zyrtare.

**KRYETARI**

**GRAMOZ RUCI**